

Diskursu Adjuntu Xefe Misaun EUA Daniel Bischof

Abertura Ezersísiu CARAT

Koronel Falur Rate Laek, Xefe Estadu Maior F-FDTL, Kapitaun Jeffrey Kilian Komandante Forsa Naval Unidade Trijésimu EUA nian, Adidu Militar sira no liu-liu ba Mariñeiru no Fuzileiru sira hotu ne'ebé marka presensa iha ne'e, Dader Diak no benvindu ba CARAT 2017.

Hau nia naran Dan Bischof no hau mak Adjundu Xefe Misaun iha Embaixada EUA nian iha Dili. Hau orgullu hamutuk ho imi ohin iha ne'e hodi halo abertura ba ezersísiu bilateral annual ida ne'e hodi hametin liu tan siguransa marítima no hasae kapasidade téknika no ekipamento inklui atu haforte servisu ekipa militar ida ne'ebe efetivu ba ita nia forsa naval no anfíbia.

Ami agradese governu Timor-Leste, F-FDTL no komponente naval ba organiza eventu CARAT tinan ida ne'e nian.

Forsa Naval EUA no Komponente Naval Timor-Leste nian halao CARAT hodi tau matan hamutuk ba interesse siguransa marítima rejiaun ne'e nian, hodi bele responde ho diak ba ameasa ruma, ita nia forsa tengke treinu ho lolos no diak, ho ekipamento adekuadu, no bele lidera hodi garante katak misaun ne'ebé halo, halo duni to ninia rohan. CARAT ninia objetivu mak ida ne'e duni.

CARAT ba tinan ida ne'e nian sei foka liu ba prosedimentu sobrevivensia ba Forsa Naval nian, manutensaun ba ro'o patrollamentu no servisu hamutuk ba hasoru ameasa marítima nian. Atividade sira ne'e demonstra esforsu konjuntu entre Amerikanu no Timor oan sira hodi harii kapasidade siguransa marítima ida ne'ebé duravel iha Timor-Leste.

Hau dezafia imi hotu atu apriende husi imi nia maluk iha atividade ne'e hodi tau hamutuk esforsu ba hadiak nasaun rua ne'e nia forsa naval nia kapasidade,abilidade no matenek. Povu Amerikanu no Timor oan hotu apoia maka'as tebes ba ita nia ezersisiu hamutuk ida ne'e.

Tenente Loe nia história sai tiha publikasaun popular ida iha istoria ami nia página facebook nian tanba ema liu 80,000 husi Timor-Leste, Estadu Unidus no nasaun seluk iha mundu mak hato'o parabens no husu atu oferece tan programa interkámbiu hanesan iha futuru.

Iha futuru, ami hakarak atu haree membru forsa naval Timor oan no marineiru Estadus Unidus nian servisu hamutuk iha ami nia ro'o bo'ot sira hodi demonstra progresu sira ne'ebé ita hetan ona.

Ami nia esperansa ba komponente Naval F-FDTL nian mak atu komponente ida ne'e iha loron ida sei preparadu liu hodi detekta no evita peska ilegal, kombate trafiku illegal, no hametin lei no ordem iha área tasi Timor nian.

Istórikamente, CARAT halao kleur ona ho nasaun seluk nu'udar ezersísiu bilateral ida, maibe haree ba importansia kooperasaun multilateral iha area marítima nian, Estadus Unidus husu Timor-Leste atu partisipa mos iha CARAT. Natureza operasaun marítima integradu nesesita kooperasaun konjuntu ida hodi asegura ita hotu nia nesesidade siguransa iha area marítima nian. Hau hakarak agradese ofisial militar Timoroan ne'ebé kaer metin ami nia bandeira Amerika iha loron ohin ho anin ne'ebé bo'ot atu la bele monu ba rai, ida ne'e, sinal respeitu nian ida ne'ebé ami apresia tebes. No agora tempu to'o ona atu realiza CARAT ne'ebé ita planeia ona durante fulan ida atu halao. Hau hein imi bele hetan susesu durante semana ida ne'e no iha futuru.

###